

Мыгнухсугнитук куйңилъык анукагак. Илин ыльтугин ыхута аңуясок, айпин инлонтундыңаның амта ыхута. Аўғым ик рыпаль сапак аңуясоғым.

– Пильқахпыңа, опопың тукуйңа.

Анукағам капа. Нунамун пыглыхлзуку иңига. Иңа, гук, рыпаль анқахсита. Таўатын кулигамсумат. Анукағам куйңилъхым иумет игунета нуналгутыни. Накын пикыңамат такут аңуясоғыт?

АКУКЫН

Ипа ытенайисаугақылгит тымңа лъыган нувуқахмит. Санамсиңоғақылгит гўатын тымңа сангитақңамың. Суқаның қалунлъақылгит, натын Қаўғани тана қалювигўақук. Углагим-сухенам пыгоқыкет қумагурат тайпағавык апыми ыганлъаглуку. Ынкам ахпалгигақылгит, ңан қулықахсақылгит.

Упынгаглуку ситытраглуки нығақыкет. Маклъахтыпихтақылгит упынгами аңьягьяўхтақңамың. Маклъит лъыган гўатын амийилькет, пилаглуки, гўатын лъыган кыпақыкет тағавык акамлъуглуки.

Тапхаққаўғақылгит. Уяққаўғақылгит. Анлъугни мантиғани калъыхтақылгит атусильтыт. Илисакут. Углат ют атуситумалгит. Сильа пинихқаўхтақңаку сукапигмың атхақылгит, пинақныхтупихсимат қонырың. Укйўуми малгукакут, пиңаюкакут ныхсакут. Ынкам нукальпегат қонпың пайқахсекут. Нунивак наўгақңан ағнағат агулақхуакут, агуқакет санилитың мантиғам юит.

Суна лъыган ыхсилькит. Акуна нальогринат сиглыхқақңата, натыхкет икльуки,акматахқаның санатакут. Ағнат сильагет атылгокут – қугаят. Таўатылнугның атакут пайығнаққамыхтыхуң ағыфсак. Қугаяльтың пехтугьяхтугакут. Пехтуғақылгит атулгит. Ңан атусат ағвық тана калаят. Ыглыгусималуку туйутыкатақңатху, уनावык қаўгьямун қанлекңата.

Синываглуни тана агилуни атуғақылге.

– Ағнақ?